



## Հուսիկ Արա

### Պատմի՛ր նրան, գնչուիի

Ի՛նչ գեղեցիկ եմ ես,  
երբ խոսում ես նրա մասին:

Ասա՛, գնչուիի,  
ափս մի նայիր,  
աչքերիս մեջ հրաշքը տես.  
պատմի՛ր նրան մինչև վերջ,  
որ ամենագեղեցիկը լինեմ ես:

Ասում ես՝ չհասնել նրան,  
նույնն է, թե կյանքում բան չես տեսել,  
նրան չգտնել, հավասար է,  
որ աշխարհում ամեն ինչ ես կորցրել.  
այդ հրաշքը հասկանալու համար ես ծնվել, ասում ես,  
և դրախտը այլ տեղ չփնտրեմ:

Նրա հայացքով լո՛ւյսը ես ուզեցի հատուցում,  
ամենաթանկը՝ իբրև պարգև  
մի ամբողջ կյանքի համար չստացված...

Խոսի՛ր, խոսի՛ր, իմ սև ու թուխ գնչուիի,  
մոռանալու արվեստը սովորեցրու ինձ՝  
անվերջ հիշեցնելով նրա մասին:

Ես լույս եմ տեսնում,  
սպիտակ հայացքով առավոտ  
և արևի մեջ քայլող երագներ.  
մի ուրիշ աշխարհ,  
որ դեռ չի եղել մեր կողմերում:

Պատմի՛ր, գնչուհի,  
ես արդեն թևեր ունեմ,  
հրեշտակ եմ ճեփ-ճերմակ,  
որովհետև դու խոսում ես նրա մասին: